

■ GLOSSA

Il merclis vegnan puspè

GISULA TSCHARNER, VEULDEN

Nus avain en vischnanca ina stizun Volg (dapi che Coop ans ha bità ord la chadaina, pervi da la rendita mancanta, matè), e las vendidras sa sprovan da cuntentar e servir bain la clientela cun hurtiedad, servetschs speziales tge sai jau sco anc. Quai è er nair basegn, la rauba custa 15–25% dapli che pli baud tar Coop.

Avant ca. in onn hani tuttenina reparti in carnet, a la cassa, dumandond, sch'ins veglia er marcas per tatgar en. Jau hai lura sfeglià enturn en quest carnet cun differentas, hai guardà sin l'indriz nov, pia las rollas per sdrappar las marcas da 2 e da 10 francs; e la giuvna sper la cassa m'ha scuviert cun ina vusch da generusadad ch'in carnet emplenì da merclis per 1000 ma procuri 10 francs suren... En mes intern èn repassads ils temps avant 40 onns, cur che las



stizuns han er empruvà da tegnair e spender lur clientas cun merclis. La mamma scheva lura: «Tgi va a cumprar en per mai? Jau hai er in carnet da merclis plain!» Uiii, lura mingin dals tgintg uffants ch'era pront dad ir en stizun e da purtar a chasa la tastga greva; ils raps dal carnet dastgav'el numnadain salvar.

Jau hai er spert quintà Jora, quant temp ch'jau vegni a perder cun tschertgar ensemen adina quellas marchettas, cun las tatgar en...

Diesch francs sin ix cumpras en la valor da milli francs... tge pro-

porziuns!! Però ma decida dad entschaiver puspè cun quest «Märklitürk» sun jau tuttina. Ord solidaritad, ord nostalgia. Povras vendidras: Ellas ston minga gia dumandar, er ils turists: «Wänd Sie Märkli?»

Ier avantmezdi hai jau er pajà, en il Volg, sper la cassa. Lura ma dumonda la dunna sco adina, sch'jau veglia ils merclis. Jau: «Gea». Sch'jau veglia er ils auters merclis per la vaschella? Ed jau, riond: «Na grazia, jau hai vaschella avunda.» Sper la cassa statan ussa trais rollas cun merclis plus in prospect cun la vaschella ch'ins sa spargnar ensemen cun ils merclis stgirblaus. La vaschella na survegn ins betg gratuitamain, sa chapescha, mo cun ina pitschnina reduenziun.

Uss hai jau gronda mirveglia, cun tgenins ulterius merclis ch'i vegnan anc sin Nadal u sin Pasca u l'avust proxim.